

Evening Dogri (NSD) News Bulletin

09-Feb.- 2026

आकाशवाणी

खास-खास खबरां

- प्रधानमंत्री नरेन्द्र मोदी हो'रें अज्ज "परीक्षा पे चर्चा" 2026 दे दुए संस्करण च विद्यार्थिं कन्नै गल्लबात कीती- आखेया जे विद्यार्थियें गी तकनीक दा गुलाम नेंई बनना लोड्चदा-सगुआं एहदा इस्तमाल अपनी छमताएं गी बधाने लेई कीता जाना चाहिदा।
- प्रधानमंत्री नरेन्द्र मोदी हो'रें अज्ज सेशेल्स लेई 175 मिलियन डॉलर दे विशेष पैकेज दी घोषणा कीती ऐ।
- भारत ते सेशेल्स बश्कार सेहत-सूचना प्रोद्योगिकी ते शिक्षा सनें 7 बक्ख-बक्ख क्षेत्रें च सहयोग बारे समझौतें बी होए न।
- विरोधी धड़े दी डंड-रौली दे चलदे लोकसभा दी कारवाई अज्ज बी दिन-भरै लेई स्थगित करनी पेई। राहुल गांधी हो'रें दोष लाया जे उनें'गी सदन च बोलने दा मौका नेंई दिता जा'रदा।
- पुर्तगाल च मध्य वामपंथी समाजवादी मेदवार एंटोनियो जोस सेगुरो नै राष्ट्रपति चुना च 70 प्रतिशत वोट हासल करियै शानदार जित्त दर्ज कीती ऐ।
- ICC -T-20 विश्व कप च अज्ज स्कॉटलैंड नै इटली गी 73 रन्ज कन्नै ते जिम्बाब्वे नै ओमान गी 8 विकटें कन्नै रहाया- जिसलै जे दक्खन-अफ्रीका ते कनाडा बश्कार मैच जारी ऐ।

<><><><><><>

ते हून खबरां विस्तार कन्नै:-

<><><><><><>

PM-PPC

प्रधानमंत्री नरेन्द्र मोदी होरें अज्ज आखेया ऐ जे विद्यार्थियों गी तकनीक दा गुलाम नेंई बनना चाहिदा- सगुआं एहदा इस्तेमाल अपनी क्षमताएं गी बधाने लेई करना लोडचदा। “परीक्षा-पे-चर्चा” दी दुई कड़ी च अज्ज विद्यार्थियों कन्नै गल्लबात करदे होई उ’नें गलाया जे मोबाईल फोन किश बच्चें लेई मास्टर बनी गेदे न- जेहडे फोन जां फही टी.वी बगैर रूटी बी नेंई खन्दे। उ’नें बच्चें गी आखेया जे एहदा मतलब तुस मोबाईल फोन दे गुलाम बनी गेदे ओ। हूंन एह फैसला तुसें’गी करना होग जे तुस एहदे इस्तेमाल पर काबू पाओ। मोदी होरें एह गल्ल Coimbatore रायपुर- गुवाहाटी ते गुजरात च विद्यार्थियों कन्नै लोआई गेदी गल्लबात दौरान आक्खी। पढाई ते शोकें बश्कार तालमेल बनाए रक्खने बारे प्रधानमंत्री होरें आखेया छात्रें गी पढाई ते रचनात्मकता गी बक्खरे नेही समझना चाइदा- दौने बराबर दे महत्वपूर्ण न ते इंदे बश्कार बडे शैल तरीके संतुलन बनाइयै रखेया जाई सकदा ऐ। मोदी होरें आखेया जे कला ते रचनात्मक गतिविधियों छात्रें गी पढाई दे बोझ कारण तनाव थमां बाहर औने च मदद करदियां न। प्रधानमंत्री होरें अच्छे नागरिक होने दी जिम्मेदारी निभाने पर बी जोर दिता- छात्रें गी अपील कीती जे ओ सिडकें पर गंदगी नेही पान- थूक्कन नेंई ते रूटी जाया नेंई करना। रोजमर्रा दी जिन्दगी दा अनुशासित रवैइया राष्ट्र निर्माण च अहम भूमिका निभांदा ऐ। मोदी होरें आखेया जे अनुशासन ते प्रेरणा- दवै जरुरी न। बगैर अनुशासन दे प्रेरणा कारगर नेंई ऐ। प्रधानमंत्री होरें जोड़ेया जे अनुशासन दिशा दस्सदा ऐ ते प्रेरणा सफर गी मजबूती दिंदी ऐ। आर्टिफिशल इंटेलिजेंस ते टैक्रॉलोजी थमां डरने दी जरुरत नेंई ऐ- कीजे छात्रें गी ए पक्का करना चाहिदा जे ओ टैक्रोलजी दा सेही ते समझदारी कन्नै इस्तेमाल करन ना- के ओदे पर पूरी चाली निर्भर होई जान।

<><><><><><>

PM -Seychelles

प्रधानमंत्री नरेन्द्र मोदी होरें अज्ज सेशेल्स लेई 175 मिलियन डालर दे विशेष पैकेज दी घोषणा कीती ऐ। नमीं दिल्ली च सेशेल्स दे राष्ट्रपति डाक्टर पैट्रिक हर्मनी हुंदे कन्नै मलाटी दे बाद इक सांझे संवाददाता सम्मेलन गी सम्बोधित करदे होई मोदी होरें आखेया जे ए पैकेज रिहाइश- ई मोबिलिटी- पेशेवराना सिखलाई- सेहत- रक्षा ते समुन्द्री सुरक्षा दे खेतर च सहयोग प्रदान करोग। भारत ते

सेशेल्स नै सेहत- मौसम विज्ञान- इलैक्ट्रॉनिक्स- सूचना प्रौद्योगिकी ते सुशासन समेत बक्ख-बक्ख क्षेत्रें च सत्त समझौतें पर दस्तख्त कीते ना। इस मौके मोदी होरें आखेया जे भारत ते सेशेल्स नां छडा भूगोलिक दृष्टि कन्नै सगुआ इतिहास- विश्वास ते भविक्ख लेई सांझे दृष्टिकोण राए बी जुड़े दे ना। मोदी होरें आखेया जे इक समुन्द्री गोआंडी ते भरोसेमंद भ्याल दे रुपै च सेशेल्स भारत दे “विजन महासागर” च इक टकोहदी ते महत्वपूर्ण थाहर रक्खदा ऐ।

<><><><><><>

Loksaba Adjourned

लोकसभा दी कारवाई अज्ज विरोधी धड़े दे हंगामे कारण दिन-भरै लेई स्थगित करी दिती गई। बडुलै सदन दी कारवाई शुरु हुंदे गै विरोधी पार्टियें दे सांसदें डंड-रौली पाना शुरु करी दिता जेदे चलदे सदन दी कारवाई पैहले 12 बजे तोड़ी ते फही 2 बजे तोड़ी स्थगित कीती गई। 2 बजे सदन दे परतियै किट्टे होने पर पीठासीन अधिकारी नै 2026-27 बरे दे बजट पर चर्चा शुरु करने दी कोशिश कीती ते कांग्रेस दे नेता शशी थरुर होरें गी बोलने लेई आखेया पर थरुर होरें गुजारिश कीती जे पैहले विपक्ष दे नेता राहुल गांधी होरें गी बोलने दी इजाजत दिती जा। एदे पर पीठासीन अधिकारी संध्या राय होरें आखेया जे उनेंगी ऐसी कोई सूचना नैई मिली ऐ ते जेकर राहुल गांधी बजट बारे बोलने चाहंदे न- तां ओ बोली सकदे ना। इस्सै दौरान राहुल गांधी होरें आरोप लाया जे कांग्रेस दे किश सीनियर सदस्यें कन्नै बैठक दौरान अध्यक्ष हुंदे आसेया दोआए गेदे भरोसे दे बावजूद बी उनेंगी बजट पर चर्चा कोला पैहले बोलने दी इजाजत नैई दिती गई। संसदीय मामले दे मंत्री किरिण रिजिजू होरें राहुल गांधी हुंदे आरोप गी खारिज करदे होई आखेया जे ऐसा कोई भरोसा नैई दोआया गया। एदे पर विरोधी मिम्बरें परतियै रौला पाना शुरु करी दिता ते अध्यक्ष हुंदे आसेया बार-बार ठाक्के जाने पर बी जिस्सलै ओ नैई मुड़े ते हंगामा जारी रक्खेया- एदे पर सदन दी कारवाई कल्लै तोड़ी स्थगित करी दिती गई।

<><><><><><>

Rijiju -Cong

केन्द्रीय संसदीय मामले दे मंत्री किरें रिजिजू हो'रें कांग्रेस पार्टी पर लोकसभा दी कारवाई च विघ्न पाने दा आरोप लाया ऐ। नमीं दिल्ली च मीडिया कर्मियें कन्नै गल्लबात करदे होई रिजिजू हो'रें गलाया जे कांग्रेस दे सदस्यें दे अस्वीकारीय व्यवहार दे चलदे राष्ट्रपति हुं'दे अभिभाषण पर धन्नवाद प्रस्ताव पर चर्चा नेंई होई सकी ते लोकसभा स्पीकर ओम बिरला हो'रें बी विपक्ष दे आचरण पर चैंता जाहिर कीती ही।

<><><><><><>

Home Minister –Naxalites

केन्द्रीय गृहमंत्री हो'रें सक्रिय नक्सलवादियें गी अपील कीती ऐ जे ओह थेयार छोड़ी देन- आत्म-समर्पण करन ते समाज दी मुखधारा च परतियै शामिल होई जान। उ'नें आखेया जे सरकार पूरी इज्जत कन्नै उन्दे पुनर्वास गी यकीनी बनाग। छत्तीसगढ़ च बस्तर दे डिविजलन मुख्यालय जगदलपुर च आयोजित Baster Pundum उत्सव दे समापन समारोह च बोलदे होई केन्द्री गृहमंत्री हो'रें संघर्ष जारी रखने आले थेआरबंद नक्सलवादियें गी खबरदार कीता ऐ जे उनें'गी बखशेया नेंई जाहग ते उन्दे खलाफ थेआरें कन्नै गै मुकाबला कीता जाहग। उ'नें आखेया जे सरकार दी लड़ाई दा मकसद जनजातीय समुदाय दी सुरक्षा गी यकीनी बनाना ऐ।

<><><><><><>

Employment Schemes Facts

सरकार नै सोशल मीडिया पर प्रसारित उस वीडियो दा खंडन कीता गेदा ऐ जेदे च दावा कीता गेदा ऐ जे बेरोजगारी बत्ता योजना 2026 दे तैहत सरकार बेरोजगार नौजवानें गी आर्थिक सहायता उपलब्ध करोआग। पत्र सूचना कार्यालय PIB दी तथ्य जांच इकाई नै दस्सेया ऐ जे ए दावा पूरी

चाली फर्जी ऐ ते केन्द्र सरकार आसेया ऐसी कुसै योजना दी घोषणा नेंई कीती गेदी ऐ। लोकें गी आगाह करदे होई ए सलाह दिती गेई ऐ जे कुसै बी बे-पंछानू लिंक जां वैबसाईट उप्पर अपनी जानकारी सांझी नेंई करन।

<><><><><><>

Iraq Hanging

इराक दे साबका राष्ट्रपति सद्दाम-हुसैन उन्दे शासन काल च इक वरिष्ठ सुरक्षा अधिकारी गी 1980 च इक धर्मगुरु दी हत्या च शामिल पाए जाने पर फांसी देई दिती गेई ऐ। राष्ट्रीय सुरक्षा सेवा मुजब सद्दाम-हुसैन उन्दे कारजकाल दौरान मेजर जनरल दे ओहदे पर तैनात ते पिच्छले बरे गिरफ्तार कीते गेदे सादौन सबरी अल कैसी गी मनुक्खता दे खिलाफ गंभीर अपराधें दा दोषा पाया गया हा- जिंदे च इक धर्मगुरु मोहम्मद बाकिर अल सद्र अल हाकिम परोआर दे सदस्यें ते होरनें नागरिकें गी हत्या बी शामिल ही।

<><><><><><>

JK Sawalkote Project

सिंधु जल समझौते –IWT गी मुअत्तल करने मगरा- इक महत्वपूर्ण फैसले च केन्द्री सरकार नै आदेश दिता ऐ जे उधमपुर ते रामबन जिले च चिनाब दरिया पर सावलकोट पनबिजली परियोजना दा कम्म शुरु किता जा रदा ऐ जेदी लागत 8 ज्हार 129 करोड़ ऐ। आकाशवाणी जम्मू संवाददाता नै जानकारी दिती ऐ जे इस परियोजना पर कम्म शुरु करने दी घोषणा केन्द्री सरकार नै पहले 10 अक्तूबर 2025 गी कीती ही- जिसलै 22 अप्रैल दे पहलगाम आतंकी हमले मगरा सिंधु जल समझौते गी खारिज करी दिता गया हा। 10 अक्तूबर गी सरकार नै परियोजना आस्तै पर्यावरण दी संभाल गी ध्याने च रक्खदे होई Clearance सिफारिश कीती ही। 4 दहाके थमां चल'दी सावलकोट परियोजना चिनाब दरिया च भारत दी बड्डी पन-बिजली परियोजनाएं चा इक ऐ।



Purtgal Election

पुर्तगाल च मध्य-वामपंथी समाजवादी मेदवार एंटोनियो जोस सेगुरो नै राष्ट्रपति चुनां च दक्खनपंथी नेता आंद्रे-वेंचुरा हुंदे पर शानदार जित्त दर्ज कीती ऐ। मतदान दे बाद कीते गेदे सर्वेक्षणें दे मुजब सेगुरो नै कोई 70 प्रतिशत वोट हासल कीते न- जिस्सलै जे वेंचुरा होरें गी कोई 30 प्रतिशत वोट हासल होए न। पुर्तगाल च राष्ट्रपति हुंदे कश कारजकारी इख्तेयार नेंई हुंदे। रिवायती तौरा पर राष्ट्र अध्यक्ष सियासी खिच्च-तान कोला उप्पर रौहन्दे होई छडा विवादें ते मसलें गी सुलझाने च दक्खल दिंदे न ते पैदा कुसै चाली दी तन्नो-तन्नी गी खत्म करने च अपनी भूमिका निभांदे न। सेगुरो औंदे मार्च म्हीने मजूदा राष्ट्रपति मारसेलो रेबेलो डी-सूजा हुंदी थाहर लैगंन। डी-सूजा 5-5 बरे दे 2 कार्जकाल पूरे करी लैते न।



Purtgal Election

पुर्तगाल च मध्य-वामपंथी समाजवादी मेदवार एंटोनियो जोस सेगुरो नै राष्ट्रपति चुनां च दक्खनपंथी नेता आंद्रे-वेंचुरा हुंदे पर शानदार जित्त दर्ज कीती ऐ। मतदान दे बाद कीते गेदे सर्वेक्षणें दे मुजब सेगुरो नै कोई 70 प्रतिशत वोट हासल कीते न- जिस्सलै जे वेंचुरा होरें गी कोई 30 प्रतिशत वोट हासल होए न। पुर्तगाल च राष्ट्रपति हुंदे कश कारजकारी इख्तेयार नेंई हुंदे। रिवायती तौरा पर राष्ट्र अध्यक्ष सियासी खिच्च-तान कोला उप्पर रौहन्दे होई छडा विवादें ते मसलें गी सुलझाने च दक्खल दिंदे न ते पैदा कुसै चाली दी तन्नो-तन्नी गी खत्म करने च अपनी भूमिका निभांदे न। सेगुरो औंदे मार्च म्हीने मजूदा राष्ट्रपति मारसेलो रेबेलो डी-सूजा हुंदी थाहर लैगंन। डी-सूजा 5-5 बरे दे 2 कार्जकाल पूरे करी लैते न।



T-20 World Cup

आई.सी.सी मर्दे दे टी-20 विश्व कप च अज्ज बी त्रै मैच खेडुे जाने हे। पैहला मैच स्कॉटलैंड ते इटली बश्कार खेडेया गया- जेहदे च स्कॉटलैंड नै इटली गी 73 रन्ज कन्नै हराई दिता। पैहले बल्लेबाजी करदे होई स्कॉटलैंड नै 20एं ओवरें च 4 विकटें दे नुकसान पर 207 रन्ज बनाए। परते च इटली दी टीम 16 ओवर ते 4 गेदें च छडे 134 रन्ज गै बनाई सकी। अज्ज खेडुे गेदे इक होर मैच च जिम्बाव्वे नै ओमान गी 8 विकटें कन्नै हराई दिता। पैहले बल्लेबाजी करदे होई ओमान दी टीम नै 19 ओवर ते 5 गेदें च 103 रन्ज बनाए जेहदे परते च जिम्बाव्वे नै 13 ओवरें ते 3 गेदें च 2 विकटें दे नुकसापन पर 106 रन्ज बनाइयै मैच जित्ती लैता। अज्ज दा त्रीया मैच दक्खन अफ्रीका ते कनाडा बश्कार खेडेआ जा' रदा ऐ। टास हारियै पैहले बल्लेबाजी करदे होई दक्खन अफ्रीका नै 5 ओवरें च 0 विकट दे नुकसान पर 54 रन्ज बनाई लैते दे ना।



Surajkund Mela

हरियाणा दे फरीदाबाद च आयोजित 39में अंतराष्ट्रीय सूर्यकूंड शिल्पमेला 2026 च इस बरे भारत ते दुनिया दी बन-सब्वनी कला संस्कृति ते दस्तकारी दा शानदार संगम दिक्खने गी लब्बा रदा ऐ। इस मेले च शामिल भ्याल राज्य दे रुपै च उत्तर-प्रदेश ते मेघालय गी शामिल कीता गेदा ऐ जिस्सलै जे मिस्र इस बरे दा भ्याल देश ऐ। मेले च मेघालय दा पंडाल सब्भनें लेई आकर्षण दा केन्द्र बने दा ऐ जित्थे बांस कन्नै बनी दियां चीजां- सजावटी समान ते पारम्परिक वाद्य यंत्र सब्भनें दा ध्यान अपनी बक्खी खिच्चा करदे ना। कुदरत दे अनुकूल बांस कन्नै त्यार समेयान बरीक कारीगीरि ते कुदरती खूबसूरती दे कारण मेला दिक्खने औने आलें च लोकप्रिय बना करदे ना। तोंआई उत्तर-प्रदेश पवैलियन सगमरमर दियां बनी दियां चीजां सारे दा ध्यान अपनी बक्खी खिच्चा करदे ना। तोंआई अंतराष्ट्रीय पविलियन च मिस्र दे सन्न कन्नै त्यार समेयान ते सिरेमिक दे पांडे सब्भनें दी वाह-वाही भटोरा करदे ना। इस्सै चाली

होर बी केंई राज्य ते मुल्खें दे कारीगिरें आसेया त्यार समेयान सारें दा ध्यान अपनी बक्खी खिच्चा करदे ना

<><><><><><>

Rly -Bulls

माल ढोआई च इक होर बड्डी उपलब्धि हासल करदे होई। उत्तरी रेलवे दे जम्मू डिविजन नै पैहली बारी 23 विदेशी नस्ल दे बैलें गी बेंगलुरु थमां जम्मू-कश्मीर पजाया ऐ। आकाशवाणी जम्मू संवाददाता दी रिपोर्ट मूजब विदेशी नस्ल दे इतें 23 बैलें चा 6 गी जम्मू-कश्मीर दे बडी-ब्राह्मणना माल शेडु ते बाकी 17 गी कश्मीर दे बडगाम Good च तोआरेयी गया हा। एह पैहलकदमी राई-बाई ते पशु पालन विभाग दे नस्ल सरबन्धी विकास कार्यक्रम दा इक हिस्सा ऐ- जिसी रेलवे आसेया सखल्ला बनाया गया। जम्मू रेलवे डिविजन दे जन-सम्पर्क इंस्पैक्टर रघुविंदर सिंह होरें आखेया जे जम्मू-डिविजन माल ढोआई दे क्षेत्र च नमीं प्रगति दे कन्नो-कन्नी ऐतिहासिक मील दा पत्थर बी हासल करा'रदा ऐ।

<><><><><><>